

Sejuta kenangan pelajar USIM di Australia

Nilai: Peluang menyertai Program Global Islamic Students Outreach (GISO) 2013 di Australia memberi pendedahan berharga kepada 15 pelajar dan dua pegawai Universiti Sains Islam Malaysia (USIM), termasuk menyelami kehidupan masyarakat Islam di negara itu.

Program itu yang berlangsung di Wollongong dan Sydney ialah antara inisiatif USIM mewujudkan platform sesuai untuk pelajarannya melaksanakan program pengantarabangsaan dengan elemen khidmat masyarakat sebagai pengisian utama ke negara dilawati.

Berpaksikan slogan 'Satu Misi, Seribu Pengalaman dan Sejuta Kenangan', objektif utama digariskan termasuklah membuka peluang kepada mahasiswa untuk menyumbang serta berkongsi pembangunan masyarakat Islam dari segi kerohanian, inte-

lektual dan jasmani.

Promosi USIM

Pengerusi Urus Setia Latihan Pembangunan Mahasiswa (ULPM) USIM, Ahmad Faezi Syakir Mohd Huri, berkata matlamat lain yang berjaya dicapai ialah membuat kajian dan rujukan pengurusan peratuan pelajar Malaysia di Australia, serta mempromosi USIM.

"Antara aktiviti diadakan ialah mempelajari seni khat Arab di Masjid Darul Imaan di Sydney, mendalami adat perkahwinan masyarakat Arab Libya, berpeluang merasai suasana pembelajaran di Al-Faisal College serta lawatan mahabbah ke University of New South Wales dan University of Wollongong.

"Selain itu, peserta turut menyampaikan sumbangan al-Quran, kelengkapan solat dan buku ilmiah kepada Masjid Omar di Wollongong dan juga Masjid

Darul Imaan di Sydney, di samping menyelami secara langsung kehidupan masyarakat Islam minoriti di Australia," katanya.

Ahmad Faezi Syakir berkata, program GISO adalah kesinambungan kejayaan agenda pengantarabangsaan ULPM sebelum ini seperti Lawatan Mahabbah 2009, Korea Selatan (2009), Misi Kemanusiaan: Mahasiswa USIM Merentas ASEAN, Kemboja dan Vietnam (2011), serta Program Misi Kembara Insani di Bandung, Indonesia (2012).

Beliau berkata, pengajuran itu adalah langkah proaktif ULPM untuk melatih dan melengkap mahasiswa dengan kemahiran mengendalikan program pengantarabangsaan berskala besar.

Bukan itu saja, katanya, peserta juga berpeluang mempraktikkan pembelajaran di USIM sepanjang tempoh di Australia.



Wakil Giso turut membuat kunjungan hormat bersama-sama komuniti masyarakat Islam di Australia.